

賜進士第日侍經筵講官同修國史奉政大夫吏部
左侍郎前翰林院侍讀學士十世孫道南頓首拜
撰

蓋序四

天順壬午以科舉事竣仰憶先考公嘗命余曰吾世
為南海人自賀豐遷居廣城僂羊里譜帙以兵燹不
存子孫世系莫究其自子孫服紀莫察其倫汝當為
後人評譜帙爾修服圖爾辨庶其傳之無替不亦休
哉余作而歎乃知先君子之言不可已也使繼自今
焉次以紀之尤可以不失其真否則親親之道弗明
惇叙之仁弗洽尊祖敬宗之心與昭穆享祀之禮胥

以失之矣豈知重者哉於是上稽世次下立宗祊為之條例以啟其端為規約以迪其德為之清隱行實以揚其休為之歷代仕宦以紀其盛尤懼夫未足以盡吾志也則世行字號之設以示遠也謝世排年之編以示思也又余之所當盡心者詳為之說豈與其終於無辨哉雖然茲固其概耳仰思遠世莫得真傳欲求鼻祖誠不可得大懼夫崇韜之誦又見於今日也故自始祖下迨至賢則十世矣用傳於後則由十

世而百世而千萬世一展是編則世次炳乎可知矣是不可以興起其惟思尚義之心哉為吾子孫者而各以心相體以禮相遜務必父慈子孝兄良弟悌夫義婦聽相親好以盡愛相聯屬以盡恩雖親盡而此意猶存毋相凌毋相高毋相戕也茲惟念哉有一於此非余修譜之意亦非吾子孫之所自待者故於是乎書